

Pol Mon Pilipai Wumb Połpu Kindim

Pol Pipe Połpu Pilipai Wumb Mulnjung Konu Ełe Kindim

¹ Pol kin Timosii teł Krajs Jiisas nge kongun wu mołpuł kin, pepe ei połpuł kin, enim Gos nge wumb Pilipai konu ełe wumb mołmun. Enim Krajs Jiisas kin dambiltik ende puk mulnjung wumb ei ni, tep er mołumun wumb ni, men ngii kongun ełmin wumb enim pei sił pipe ei ngopuł kindmbił.

² Sinim nge Erinjpin Gos ni, Owundu Jiisas Krajs ouni enim kin noman emin wii enim ngang kin, enim noman emin ka seng mułngii.

Pol Noman Ka Piipi Gos Ngum

³ Kunum kunum ełe, na enim kin piip kin, Gos kin noman ka piip ngoł.

⁴ Na enim kin kunum kunum Gos kin prei erip kunum ei, na ka piip ngond.

⁵ Nimbił erang enim na Gos kongun enjingił mił, kumb se paki toł ni, pe paki tumun ku.

⁶ Yi mił erang, na piip poru nind ei, yi mił pałim. Gos enim noman tuk ełe kin, kongun ka wii enim kin pułngun mondpu erim. Gos eim kongun ei, erpi pang kin, Jiisas Krajs kunum Owundu simba kunum ei, poru nimba.

⁷ Pe na noman yi mił piip kin, enim ngond ei, kapłi kun ka minj mołum. Nimbił erang na enim kin noman ka ngoł. Ei yi mił, enim pei Gos nge

noman ka ei, na kin ngum ei, enim pei na kin noman ka ouni sinjing. Kunum tał pei, na kan ngii ęle mult kunum ei ni, kunum ei na Gos ek ka ni tor kindip ęle nge, dinga angip endinj. Kunum ęle, enim na kin ouni erik kin, paki tok mulnjung.

⁸ Gos mendpił eim kanpi piinim ei, na ek keimi mendpił nip, yi mił ngond. Na noman dinga kindip op kin, enim kenmbii ni piip mił piinand mon. Na noman ka ngołum oł ei, enim kin ngop ęle, Jiisas Kraiss na kin ngum.

⁹ Na enim kin Gos prei erip kin, kii sip ngop ei, yi mił, Na prei erip kin, enim nge noman ka wumb kin ngołum oł ei, dinga tonu ok, nga enim noman ka wii keimi ni, oł kun ka ęmin oł ei piik kin, kun erngii ku.

¹⁰ Ei mił, en enim kaplı oł kun ka ęmin oł ei, mok tok kin, piik kun ka mendpił erngii. Nga Kraiss omba kunum owundu ęle, enim Kraiss ningił ęle, oł kun ka wii molk kin, oł kis endi enim kin mulerngii mon.

¹¹ Mułangin kin, Kraiss Jiisas eim enim kin oł kun ka ei, enim andan topu erang kin, oł kun ka oł ei, enim noman tuk ęle kin, am piki top mułmba ei mułang kin, enim Gos nge embe ambił tonu kindngii ei, am ei tonu pupu pimba.

Pol Kan Ngii ęle Pim Ei, Gos Ek Ka Paki Mił Tum

¹² Engnan nol! Na noman piip mił ei, enim piingii ei, oł embin tui na kin tonu om ei, ek ka nge andlam ei, ondu ngunerim mon! Ei ek ka ei am pengli; wumb piinjing ni, oł yi mił erim.

¹³ Oł yi mił erim ei, Sisa ngii ęle tep er mołmun wumb, opu wu ombu ni, nga wumb eipi pei ya

mołmun wumb ei, na Jiisas Kraiss nge kongun wu ełe nge, kan ngii pir ei, wumb na piinjing ku.

14 Wumb ombu, na kan ngii pinj ei, piik kin, poru ninjing. Yi erang, enginpin noł kombur pei, Owundu kin pii gii ninmin ku. Nga en enim nge noman ełe dinga sik kin, mund mong ei si kindik kin, am Gos nge ek ka ei, am nik dinga kindik endnjing.

15 Keimi, wumb kombur na embe punum nik kin, na kin noman kis piinjing. Piik kin, na to mani kindmin nik enjing. Pe oł ełe nge, Kraiss eim ek ei ni tor kindnjing. Nga wumb kombur na Pol kin, noman ka piik ngok kin, Kraiss nge ek ka ni tor kindik kin, paki tok ełmin ku.

16 Nga wu ombu piinmin, na ya kan ngii mołup kin, dinga kindip, opu orung mił erip, Gos nge ek ka dinga ni tor kindip mił ei piik kin, na noman ngonmun. Ngok kin, ek ka ei ni tor kindiłmin.

17 Ba wumb kombur en enim nge embe eł nge, piik niłmin. Nga Kraiss nge ek niłmin ei, noman kun pałim mił ei, ni tor kindnałmin mon. Na kan pir ek embin tui ombu tui mił, nik tuk kindik kin, oł yi mił ełmin.

18 Pe nga ei epi nipe? Ei minj oł pei ełmin ei, oł keimi mendpił min, oł kend yi mił ełmin ku. Ei nge nik kin, Kraiss nge ek ka ei, nik wumb ngołmun. Oł ełe nge na ka piind. Ei am ka minj piimbii.

Pe Na Konj Muls Kin, Kraiss Kin Ouni Mułmbii

19 Nimbił erang na piip poru ninj ei, enim kunum kunum prei erik kin, na paki to ngołmun. Ngangin kin, Jiisas Kraiss nge Gui Ka ei nge, dinga

na ngołum. Pe na piind epi ei, tonu onum ei, na paki tang kin, na am ka wii mułmbii.

²⁰ Pe yi mił erang kin, epi ei tonu omba ni, ka piip moł ek ei, ek ka wii tonu omba ełe nge, kui er moł. Ei tonu wang kin, ei nge na ek nip tor kindinj na singambił kulermbii mon! Ermbii oł ei yi mił, na nam eł oł ei, yi ku, erip mułmbii. Mułamb kin, pe na konj mułmbii kunum min, kułmbii kunum ei, na nge ngenj ei, Krai nge embe ełe tonu omba.

²¹ Keimi, na nge noman ełe yi mił pałim. Pe na noman ei konj ka pep nim kin, na Krai nge embe ambił tonu kindmbii ei kapłi. Ba pe, nga na kuls kin, na epin konu ełe noman konj simbii ei, ka wii mendpił.

²² Nga na ya mei ełe konj muls kin, na kongun end kongun ei, epi keimi tonu omba. Ba na nipe andłam endi ekii sip ermbii ei, na piinand.

²³⁻²⁴ Na nam noman tuk ełe tał pałim. Na kołup pup kin, Krai kin epin konu ełe ouni mułmbii ei, am ka wii. Ba na enim kin ya mei ełe muls kin, ei nga na enim paki tumbii ei, ka wii ku.

²⁵ Na pii gii dinga nip kin, na piip poru ninj ei, nga na enim kin ouni mułup kin, enim paki tamb kin, enim pii gii dinga nik kin, ka wii piik mułngii.

²⁶ Yi mił pałim ei piip kin, na nga op enim kin ombii. Nga enim na kin ka piik kin, Krai nge embe ambił tonu kindngii.

Pilipai Wumb Enim Pol Kin Tep Tok Ende Pu Molk Opu Erngii

²⁷ Ba enim andłam endngii oł ei, am kun ka erik andik kin, Jiisas Krai nge ek ka ełe mił, ekii sik wumb eipi andan tok, yi mił erngii. Nga na

op enim kenmbii min, nga na enim kin onermbii min, ei epi wii mił, ba na enim nge ek ei piimbii ełe ei, enim noman ende sek kin dinga angk mułangin kin piimbii. Molk kin, noman ende sek kin, wumb paki tok, kongun dinga erik yi erangin kin, Krai nge ek ka ełe, pii gii dinga nik mułngii.

²⁸ Na piimbii end ek ei, enim nge opu orung wumb ek endi ningii ei, mund mong enenjing. Pe enim mund mong enenjing kin, pe wumb en enim piingii ei, en enim dup konu kis ełe ngenj kumbii kis singii. Ba Gos enim andan yi mił tumba ei, Gos eim erang kin, enim sipi orung simba.

²⁹ Nimbił erang Gos enim Krai nge kongun ka erngii nipi kin, enim noman ka ngum. Enim Krai kin pii gii ningii nge nip kin, eim dinga ełe mendpił ngunerim mon; ba enim Krai nge embe ełe, ngenj kumbii singii nipi kin, enim eim dinga ngum ku.

³⁰ Na pii gii ełe nge, ok opu dinga erir ei, enim kenik. Pe nga na opu end mił ełe nge, ei enim piinmin. Pe enim piinmin ei, na opu end mił oł ei, sinim ouni tep topun er mułmun.

2

Sin Sinim Nge Noman Ełe To Mani Kindpin Enginjin Nol Noman Ngumun

¹ Pe enim Krai kin mołmun ei eim kin, noman tuk ełe dinga siłmin min? Pe enim eim noman ka sik piik kin, enim noman emin ka mołmun min? Enim Gos Gui Ka nge noman konj ełe, ende mołmun min? Nga enim wumb eipi kin noman ngok, kaimb sik, yi ełmin min mon?

² Pe yi mił pim kin, pe enim na kin noman ka mendpił piik ngungii ei nge, tonu omba oł yi mił pałim. Enim noman ende sik kin, wumb eipi kin noman ka ngok ei, oł endeim mendpił pimba. Peng kin, noman ende sek mułngii.

³ En enim noman ełe, embe wii ambil tonu kindnerngii mon! En enim noman ełe, to mani kindik kin, nga wumb eipi nge embe, to tonu kindngii wumb ei, ka wii ni piik erngii.

⁴ En enim nge noman ełe epi ei mendpił, tep er mulerngii mon! Ba enim wumb eipi nge noman ełe, epi ei tep ka er mułngii ku.

Krais Eim Embe To Mani Kindang Kin Gos Eim Embe Ambil Tonu Kindim

⁵ Krais Jiisas nge noman endeim sirim mił ei nge, enim noman ende yi mił mendpił singii.

⁶ Kumb ok, Jiisas Gos kin ende mendpił mul-tum. Ba Jiisas eim Gos nge noman dinga tep er mołum oł ei nge, dinga ambil gii ni piinerim mon. Eim Gos kin ekii sipi kin, mandring mułum.

⁷ Mon! Eim nge oł dinga ei si kindpi kin, nga eim mei wu mił mani om. Opu kin, eim kongun wu wii mił, yi er mułum.

⁸ Wumb kenjing ei, eim mei wu mił mendpił mułum. Eim nge noman ełe embe ei, to mani kindim. Kindpi kin, Gos nge noman ełe ekii sipi erim. Oł yi nge pepi pang kin, eim kułum kunum ei, poru nim. Pepi pang kin, keimi ond peri ełe kułum.

⁹ Kułang ełe nge mendpił, Gos Jiisas nga konj sipi kin, eim to tonu mendpił kind mundum. Nga Gos eim embe ka wii mendpił endi ngum ei, wumb nge embe pei to mani kindim.

¹⁰ Kindrim embe ei, Jiisas pa nipi ngum. Ngang embe ei, tonu epin konu eŕe wumb ni, ya mei eŕe wumb ni, mei mandring eŕe wumb ni, wumb ni pei, Jiisas eim endeim ambiŕ tonu kindngii. Kindik kin, nga mong gopsing pii polk kin, eim embe eŕe ek ka nik kin, eim nge embe ambiŕ tonu kindngii.

¹¹ Wumb pei gupu eŕe ek yi miŕ ningii. “Jiisas Kraisi ei Owundu,” pa ningii. Yi miŕ nengin kin, Erinjpin Gos nge embe ei am tonu ba.

Enim Tiŕang Miŕ Tuk Wumb Pei Kin Muŕngii

¹² Kapli, na nge wumb puŕ ei yi miŕ, ok na enim ek ninj ekii sinjing ei, pe yi miŕ ku erngii. Na enim kin muls kunum eŕe, enim epi erngii ek ei ninand mon! Ba pe, na konu turii moŕ kunum eŕe, enim na ek ekii sik kin, am oŕ yi nge erngii. Gos enim sipi orung sim ei nge, mund mong erik kin tungu erngii. Yi erik kin, kongun dinga erik muŕangin kin, Gos enim noman konj ka epi enim ngumbii nirim epi ei, ngang singii.

¹³ Enim piinmin ei, Gos enim noman tuk eŕe kongun erpi moŕum. Nga Gos eim noman eŕe, enim noman tuk eŕe kindim. Kindang kin, nga Gos eim noman paŕim miŕ, yi kongun erik muŕngii. Yi erik muŕangin kin, Gos enim kan ka kenmba.

¹⁴ Enim epi pei enmin oŕ ei nge ek miŕ enmin oŕ ei ni, kis piik, kii sik enmin oŕ ei ni, pei si kindik kin, er muŕngii.

¹⁵⁻¹⁶ Yi miŕ erang, enim oŕ yi miŕ erik kin, enim kun ka muŕngii. Nga pund mong endi, enim kin pinermba mon! Enim Gos kingam noŕ mendpiŕ muŕngii. Nga enim noman tuk eŕe, orpuŕ miŕ

endi pinermba mon. Enim ek wumb noman konj ngołum ek ei, ambıl gii nik mułngii. Ei molk kin, wumb tılap eipi pii gii ninenjing wumb ełe, enim tuk molk kin, dup mił tılang erang kin, ya mei ełe wumb oł kis elmin wumb ei, kin mułngii. Mułangin kin, nga Kraıs Owundu tonu omba kunum ei, na enim kin pei ka piimbii. Piip kin, na noman ełe yi piimbii ei, na kongun wii mił erip kin, nga nam nge dinga ei, wii mił kindip ermbii mił mon!

¹⁷⁻¹⁸ Enim nge pii gii ei, Gos kin kułmał kalılmin mił yi pałım. Nga kułmał kalılmin poru nimba epi ełe, noł wain bein tołmun. Yi peng kin, na miyem ełe, noł wain mił bein tok, enim kułmał kalılmin poru nimba erang bein tok kin, tonu kindnjing pim kin, ei epi wii mił. Ei na ka piimbii. Keimi, na enim kin ka piip ngumbii. Nga enim yi mił ku, ka piingii. Enim na kin ouni ka piipin mułmun.

Timosii Nge Ek

¹⁹ Ba na Jiısas Owundu pii gii ninj kin, kaplı Jiısas eim noman ełe yi piim kin, kunum olt mon, na Timosii kindamb kin, enim kin omba. Nga Timosii orung opu, enim ek na kanpi neng piimbii. Piip kin, na ka piimbii.

²⁰ Na nge wu Timosii mił, nga wu endi mulałım mon! Eim na kin noman ende sep ngołum. Ngopu kin, eim nge noman tuk ełe enim paki tumbii ni dinga piıłım.

²¹ Wumb eipi pei, en enim noman ełe epi ei, minj tep ka er mołulmun. Molk kin, Jiısas Kraıs nge kongun ei, tep ka enałmin mon.

²² Ba enim wu Timosii elim oł ei piinmin. Timosii eim oł kun ka elim wu. Eim na Kraiss nge ek ka kongun erir konu ełe, eim na paki tołum wu. Ei eim yi erim ei, wu endeim kingam ei, eim arim paki tołum mił, Timosii na kin yi elim.

²³⁻²⁴ Pe na kan ngii ełe tor op piip kin, na Timosii kindamb kin, enim kin sikir omba. Pe na pii gii nind ei, Jiissas Owundu eim andlam endi top simba. Nga kunum aninga kopur na yi ku, mołup kin, nga enim kin ombii.

Wu Epaproraisis Nge Ek

²⁵ Na nam piip kin, wu Epaproraisis kindamb kin, enim kin omba ei, sinim nge enginpin. Na kongun ende wu ei, sił opu ende ełmbił wu. Ok enim eim kindangin kin, na kin opu ei, enim nge men ek niłim wu ei, na paki tołum.

²⁶ Eim nge noman ełe, enim kin opu kenmbii ni piipi kin, noman embin topu mołum. Eim ening palim enim piinmin ei nge, eim noman embin to piinim.

²⁷ Keimi, ok eim ening pim. Peng kin, eim kułmba mandi erim. Ba Gos eim kin kaimb sim. Ba Gos eim kin mendpił, kaimb sinerim mon! Gos na kin kaimb sim ku. Gos eim oł embin tui ei, na kin pei tonu omba ei, mon ni piipi kin, na paki tum.

²⁸ Yi mił ku, na nam noman ełe, na Epaproraisis eim kindamb wang kin, enim nga kan ka kanik piingii. Ka piyangin kin, nam noman embin ei, aninga mani mił ba ku.

²⁹ Gos Owundu kin ka piik ngok kin, wu Epaproraisis omba nge, ka piik sik kin, enim eim kin

noman ka piingii. Wu yi nge, enim embe ambil tonu kindngii.

³⁰ Wu ei, Krai nge kongun er pupu kin, kułmba mandi erim. Eim konj mułmbii ni piinerim mon! Eim kongun ei piipi kin, enim kapli na paki tunenalaŋgin kin, eim ni piipi kin, na kongun paki topu poru niłang.

3

Krais Kin Pii Gii Ninim Wu Ei Wu Kun Ka Mendpił

¹ Angnan noł! Na ek ei yi mił połup poru nimbii end. Enim Jiisas Owundu kin noman ka piingii. Na pipe ei nga polt ei nge, na noman embin topu poland mon. Nimbił erang na pipe nga ei, połup enim ngond ei, na enim kin paki top ngond.

² Wumb kung owu mił, oł kis kanim kanim ełmin wumb mołmun ei, enim kanik kun erik mułngii! Nga wumb ei nge, lo ek ekii sik kin, ngenj kopsik ełmin wumb ei enim kanik kun erik mułngii! Wumb ei ngenj kopsik ełmin oł ei, andan tonum wumb ei, Gos nge wumb.

³ Ba sin sinim noman tuk ełe Gos nge Gui Ka ełe mułang kin, sinim andan topu kin, sinim Gos nge wumb mołmun. Yi mił Gos embe ambil tonu kindpi kin, nga Krai Jiisas kin ouni embe ambil tonu kindmin. Sinim ngenj kopispin oł ei, sinim nge pii gii ei, paki tunanim mon.

⁴ Pe na nge noman ełe yi pim kin, ngenj ełe oł ei, na Gos sipi orung simba nge andłam endi sałim ei, na kapli paki tumba. Nga wumb kombur ngenj ełmin oł ei, sin kapli paki tumba ni, pii gii ninmin

ku. Ba na nam noman eġe, am mendpiġ, yi miġ to piimbii.

⁵ Piyamb nimbiġ erang kunum angġiġ orung nga tekliki o pang kin wumb kombur na ngenj kopsik. Na Esrel nge wu. Na Benjamin nge tiġap wu moġ. Eipru wumb ei na miyem ende. Na lo ek ei, na am keimi ekii siġ wu. Ba oġ ombu ei nge, na Gos sipi orung sinermba mon.

⁶ Gos nge kongun eġe, na dinga kindip kin, ekii sip enj. Na Gos nge wumb ei, oġ embin tui ngop endinj. Nga yi ku, na wu endi na lo ek ekii siġim min, nip kii simba ei, na mong endi pinermba mon.

⁷ Ba epi pei saġim ni, na embe ambiġ tonu kindngii ei, epi wii miġ ni piind. Nimbiġ erang, Krai mendpiġ moġum ni piind.

⁸ Jura wumb oġ ei nge, na piip ninenj mon. Nimbiġ erang Krai Jiisas eim na nge Owundu moġum ei na piind. Pe na ni piind ei, Krai kin pii gii nipin enmin ei, keimi ni piind. Na Krai nge oġ ei ekii siġ. Sip kin, oġ eipi eipi pei si kindip, epi pei ombu, epi moġ wii miġ, ni piind. Yi erip kin, na Krai eim, am ambiġ gii nimbii ni piind.

⁹ Pe na Krai kin dambiltip ende pup moġ. Lo ek eġe, na wu kun ka eġ wu nimba ei, na piinermbii mon! Nam oġ yi nge eġ, embe kun ka piimba ni piind. Piip kin, Krai kin pii gii nind eġe nge, Gos eim na pii gii nind ei, eim na wu kun ka nimba.

¹⁰ Na Krai am pii pol tumbii. Nga eim angpi konj tonu om. Kunum eġe, na Krai eim nge dinga ei, na kenj. Na eim nge dinga ei, pii pol tumbii ni piind. Na Krai eim kin ende pup kin, eim ngenj kumbii sinim ei, ouni simbii ni piind. Eim Gos kin

ekii sipi, piipi kultum epi ei nge, na eim piip kin, yi ku ermbii ni ambilip gii nip moł.

¹¹ Na dinga kapli erim kin, na oł yi mił erip kołup kin, nga tukpu ełe, nga op konj pup kin, Krai kin epin konu ełe bii ni piind ku.

Pol Eim Sikir Pupu Kin, Epi Ka Wii Ok Silim

¹² Na yi mił ni piinand. Nam Krai nge elim oł kun ka pei sip poru ninand mon! Ba oł ei nge, na kongun dinga erip ambil gii nip moł. Yi erang kin, Krai Jiisas eim yi mił erpi kin na ambil gii nip mołum.

¹³ Engnan noł! Krai nge oł ei, sip poru nip moł ni, piinand mon. Ba na noman endeim mendpil palim. Na oł ok nge kanim kanim pei enj ei, si kindip poru ninj. Si kindip kin nam kongun dinga erip ekii se, epi ka wii tonu omba epi ei, simbii ni piip end.

¹⁴ Na andlam dinga sikrił ei nge, sikir pup kin, epi ka wii ei yi mił, Krai Jiisas nge noman konj ka wii ełe mendpil, simbii ni piind. Nga epi wii endi mon. Gos Krai kin na wii topu sipi kin, orung sim ei, na epin konu ełe tonu bii ni, wii topu sim.

¹⁵ Pe sinim nge noman ełe, Gos kin noman dinga Gos nge wumb mendpil mił pim kin, pe na ek ninj mił ei, ekii singii. Ba enim noman endi eipi pim kin, pe Gos eim enim noman ełe, kapli andan topu kin, er kun ermba ku.

¹⁶ Ba sinim Krai nge oł kun ka wii sinjpin oł ei, am ambil gii nipin mułmun.

¹⁷ Engnan noł! Enim pei na end mił oł ei, pei ekii sik, erik poru nei. Nik kin, wumb oł kun ka

yi nge enmin ei, kanik kun erik kin, enim oł ei ekii sik, yi er mułngii ku.

¹⁸ Na ok, enim kunum kunum kanip ek ninj ek ei, nga enim kanip nind ku. Pe na ningił ełe ke nind. Wumb pei Kraiss nge ond peri ełe kułum ei, wumb opu orung mił enmin.

¹⁹ Wumb ei, en enim nge ngenj noman ełe, gos mił to tonu kindmin ni, yi piinmin. Wumb oł singambil palim epi ei, en enim noman ełe, ka ka piik enmin. Erik kin, nga mei ełe epi kis ombu, noman to piik er andinmin; ba wumb ombu nge, dup konu ełe, ngenj kumbii dinga singii.

²⁰ Ba sinim, epin konu nge, wumb mendpił mołmun. Owundu, Jiisas Kraiss tonu epin si kindpi kin, mani mei ełe omba nge, enim kui er mołmun. Mułangin kin, opu eim sinim sipi, orung simba ei nge, sinim kui er mołmun.

²¹ Pe nga Kraiss opu kin, sinim nge ngenj wii ei erang kin Kraiss nge ngenj konj ka wii, yi mił simba. Seng kin, sinim Kraiss nge tiłang owundu ei mił, sipin mułmun. Nga eim nge dinga ełe erang kin, epi pei ei, eim kin mandring mułangin kin, eim tep er mołum.

4

En Enim Noman Ende Sek, Noman Ka Piik, Noman Ka Singii

¹ Angnan noł! Kraiss nge oł yi mił palim ei piik kin, enim Jiisas Owundu kin dinga angk mułngii! Na ek nind mił mułngii. Na enim kin noman ngoł. Ngop kin na enim kin kaimb sił, nga enim na kin

noman ka piik ngangin kin, enim na nge noman ka puł mił, wumb ka mołmun.

² Ełip Yuoriya kin Sindikii ełip amb tał ełip piyeł. Ełip Jiisas Owundu kin noman ende singił.

³ Pe nim na nge kongun ende wu mendpił. Na nim kanip ek nind. Nim amb tał ei paki to! Amb tał na kin, Gos nge ek ka eł, tep topun kongun ka er endinjin. Pe Klemin ni, na nge kongun ende wumb ni, amb tał kin kongun ende enjing. En enim nge embe ei, noman konj singii pipe ełe pałim.

⁴ Kunum kunum enim Jiisas Owundu kin dambiltik ende puk ei nge, ka piik ngungii. Na ek nga nind ei, enim Jiisas kin ka ka piingii!

⁵ Wumb pei enim kin piingii. Enim wumb eipi kin, oł emin ka ełmin. Nimbil erang Jiisas Owundu mandi orung omba enim.

⁶ Enim epi endi kin, noman embin kulerngii mon! Ba enim eipi epi endi simin ni piik erngii ei, enim Gos kin prei erik, kii sik, eim kin kunum kunum noman ka piik ngok, yi erngii.

⁷ Gos nge noman emin ka oł ei, sinim ngołum ei, mei wumb pei noman dinga ei to mani kindnim. Nga Gos nge noman emin ka oł ei, sinim Kraiss kin dambiltin ende pupun mołmun nge, noman tuk ełe ni, noman ei Gos tep ka er mułmba.

⁸ Engnan noł! Na ek endi nga nimbii end. Oł pei ei oł keimi ni, pe nga oł ei nge, noman ka wii er pałim ni, nga oł kun ka ni, nga oł kis endi penj mulalim oł ei ni, nga oł ka wii ni, nga oł kun ka ei nge embe ka pałim. Nga oł ombu pei, eim oł kumb ełe oł pałim ei ni, nga oł ombu pei wumb embe ambil tonu kindinmin, oł ombu nge

pim kin, enim kunum kunum noman eġe piik er muġgii.

⁹ Oġ ombu pei, na enim nip andan top ngunj ei, sik poru ninjing. Nga oġ epi pei piik kanik, er poru ninjing oġ yi nge, enim kunum kunum yi erngii. Yi erangin kin, Gos noman emin ka sinim ngoġum ei, enim kin ouni muġmba.

Pilipai Wumb Epi Ka Ei, Wii Ngunjung Ei, Pol Eim Noman Ka Piipi Ngum

¹⁰ Na noman ka owundu piip kin, sinim nge Owundu ngond. Pe nga enim na kin noman nga to konj keimi ok, enim na piik; ba enim ongii nge andġam endi sineririm.

¹¹ Na epi endi sinaġim nip kin, yi kii sinand mon! Na oġ yi nge, ei piip poru ninj. Pe oġ kanim kanim na kin tonu om kin, na oġ ei nge, noman to piinermbii mon. Na noman eġe epi ombu ei, kapli ni piil.

¹² Na wu endi epi sinaġim miġ, yi na ka piip muls. Moġup kin, na epi pei ambiġ gii ni ka piip muls ku. Wumb kuni pei noġmun oġ ei, na ka piip moġ. Nga wumb kuni toġum oġ ei, na ka piip moġ ku. Wumb epi pei seng moġmun oġ ei, na piind ku. Nga wumb epi sinerang er moġmun oġ ei, na piind ku. Na kunum kunum konu orung orung pei, na kapli oġ pei ei, kapli ni ka piip moġ.

¹³ Krai eim am dinga ngoġum. Nga eim nge dinga eġe, na epi pei kapli ermbii.

¹⁴ Ba enim oġ ka erik kin, na kin paki tok kin, na embin tui ko wupun ei sinmin.

¹⁵ Pe enim Pilipai konu eġe wu amb, en enim yi miġ ni piinmin. Ok na Gos nge ek ka ni tor

kindip endinj kunum ei, na na andip pup kin, Maseroniya konu eġe tor punj kunum ei, Gos nge tiġap wumb endi, nga na kin o ende punenjpin mon. Nga epi ka ngok eġmin oġ ei, endi enenjpin mon ku. Ba pe enim mendpiġ, oġ yi enmin.

¹⁶ Keimi, na Tesalonaika konu eġe muls kunum ei, enim yi ku na kunum endeim paki tunjung. Nga ekii se, enim na paki tunjung ku.

¹⁷ Pe na nam ka wii epi endi enim kin simbii nip kin, kan sinenj mon. Na noman eġe ei, enim nge oġ ka ei, Gos nge epi ka wii enim ngumba. Ngang kin, enim epi ka wii ei singii. Nimbiġ erang enim na paki tunjung.

¹⁸ Ba am epi pei, na kin am kapġi er saġim ei, na sinj poru nim. Na ngii konu ei, epi pei piki to moġum. Enim nge ka epi wii ngok kindnjing ei, Epaproraisis ngangin kin, tu wum ei, na sinj. Epi ka wii ngunjung ei, Gos kuġmaġ kaġiġmin muru ka toġum miġ, yi paġim. Epi ei, enim Gos ngunjung ei, Gos eim epi yi nge siġim. Pe Gos eim noman eġe ka piġim.

¹⁹ Na nge Gos ei, eim epi kanim kanim ka wii Krai Jiisas kin saġim. Pe nga enim epi endi sinarpi nim kin, Gos eim kapġi enim kin ngumba.

²⁰ Gos ei Gos, sinim nge Erinjpin Gos. Yi peng piipin kin, sinim Gos eim embe kunum kunum ambiġ tonu kindmin, ei keimi!

Ek Aninga Kopur Nga

²¹ Krai Jiisas nge wumb ei kin, na ek ka nip 'Muġeiyo' nind! Angnan nol! Na kin moġmun ei, enim kin ek ka nik, 'Muġei,' a nik ngonmun.

²² Gos nge wu amb ni, wumb pei enim kin noman ka piik ngok, “Enim mułeiyo!” ninmin. Wumb kombur king owundu Sisa ngii ełe kongun ełmin wumb ei, en enim dinga puk kin, ‘Enim mułeiyo!’ nik yi enmin.

²³ Jiisas Krai Owundu nge noman ka ei, enim kin mołpu kin, enim noman tuk gui ełe, paki tang kin, ouni mułngii.

Gos Nge Ek Ka Ei Sinim Kin Ngołum
The New Testament in the Nii Language of Papua New
Guinea

Nupela Testamen long tok ples Nii long Niugini

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Apr 2025 from source files dated 31 Aug 2023

57529bce-9e23-5350-904d-243a1b359818